

## QVÆSTIO MEDICA

Quodlibetariis disputationibus manè discutienda in Scholis  
Medicorum die Iovis 28. Ianuarij.

M. LUDOVICO POIRIER, Doctore Medico, Præside.

*Est-ne ullum sani hominis excrementum corpori inutile?*

### I.

**Q**UICQUID humoris continetur humano corpore, id Alimentum est aut Excrementum. Alterum ab altero longe dispar & substantiæ & præparationis modo. Alimentum quidem varia ventriculi, viscerumque aliorum ope aptatum sufficitur singulis partibus resciscendis. Excrementum verò, genus istud humoris ab alimento degeneris, tantum abest à nutriendi facultate, quantum alimentum ab excrementi ignobilitate, quæ ex coctione quâlibet ei contingit. Nunquam igitur chylum, ut ut esset suis adhuc sordibus impurior, hoc nomine contaminabis: nunquam sani hominis sanguinem, quandiu venis capitur, ut ut copia cumulator morbum intenderet, vel naturæ jussu menstruum meditaretur fuggam. De medullâ autem ossium dubitandi locum nec sordidi auctores dederunt, num hæc alimenti potius quam excrementi tribu excipi debeat? E quâ deinde pinguedo rejicitur, quasi excrementum haud natum excerni: cujus natura ideo inhabili ad alendum indole æquius æstimari possit, quàm ullâ è corpore exeundi necessitate. Quamobrem velut Aristocratica Respublica summum jus omne non adeo tribuit optimatibus, plebique decernit obsequium, quin hæc illis maxime proffit ad imperij incolumitatem. Neque etiam in corporis familiâ, alimentum ita tenet principem humoris locum, quin viliori etiam excremento, nedum lacti, semini, pinguedini sua relinquatur utilitatis tessera, in communem hominis salutem conferenda.

## I I.

**S**ANUS homo suarum esse debet integer functionum. Sed pro cuiusque coctionis modulo, seu privata sit seu publica, nihilofecius assiduam & multiplicem patietur excrementi ab alimento secretionem: cuius rudimenta primum in ventriculô ponuntur, ac deinceps in intestinis stercus perficitur & pituita: quâ nihil frequentius, nihil obscurius in ore Medicorum. Deinde quocunque in viscere, sive in Jecore, sive in corde cudatur sanguis, ex ejus elaboratione hinc bilis superstes videtur, inde creditur melancholicus succus, tam incertæ sedis, quam virtutis. Interea chylus altiores pervadit viarum labyrinthos, nec non alter humor ad alendum chylo longe paratior quoquoeversum decurrit, vehiculo feri, quod longe ab ichore discrepat. Hoc autem commune totius corporis excrementum, sive ex aliquo sale fustum fuerit, sive ex aquæ potûs ciborumque portione liquidum, perinde ad urinas defluit & sudores, lacrymas, mucus, salivam, sputum, tot partium peculiares veluti sordes, quæ non secus ac aurium recrementa privatam consequuntur nutritionem: quemadmodum & alia diversi generis quamplures, quæ interno, & externo perspirationis beneficio sensim sine sensu emittuntur, instar fuliginum ex quâcunque corporis regiunculâ occultè vel apertè erumpentium.

## III.

**N**EQUE hæc è corpore exeundi ratio impedit, quominus excrementum sani hominis corpore conceptum, & publicam & privatam coctionem promoveat, suo quodque Naturæ modo non vitiosum. Quid enim salivâ vilius, aut facilius excerni? Hæc tamen man'os in ore cibos diluit, dilutos in ventriculo incidit, & potûs interventu in cremorem liquat, elixum calido auxilio fæcum, quibus nihil spurcius aut inutilius videbitur: quanquam per amplissimos intestinorum tubulos circumlata, subtus hepatis & ventriculi officinam, ac circumcirca Mesenterij sentinas, nonnihil valeant ad chylum conficiendum, & confectum ad suos viarum ductus agendum. Non secus ac Olitores, Agricola, vel Chymici pleraque opera ad maturitatem sino perducunt, ita etiam natura. Quæ præterea simi humani descensum tacito bilis stimulo accelerat, pituitâ intestinis obductâ ne acrius lædantur, & stercoris bilisque vehementioris aculeos parumper obtundente. In quo multiplici offi-

cio totuplex excrementi genus eritne inutile, sine quo vel plurimum bonitatis à sanguine decederet? Quid si vitalem in corde flammam à moderatâ bile excitari diceremus, quemadmodum ab immoderatâ febrilem? Quid si pancreaticus succus à nobis melancholici instar haberetur ad famem excitandam? Is saltem suâ partium agilitate chylum sursum deorsumque impellens, vacuitatem infert, à quâ certior esse queat quotidianæ famis sensus & origo, quam ab ullâ ventriculi constrictione per melancholicas reliquias.

## IV.

**V**ERUM excrementi utilitas non adeo ex novitatis arbitrio pendet. Jamdiu serum, toti corpori, & cuius coctioni longe communius quàm cuius morbo, succum omnem mobiliorem reddit, facilioremque ad intimos partium recessus subeundos nutritionis gratiâ, eò quidem infelicioris, quò aliturus humor ad modum Sambucinæ medullæ magis concreveret suo non dissolutus seroso excremento. Hoc deinceps quocunque pervadit ex Naturæ lege, ibi certa relinquit vestigia suæ ad bene vivendum opportunitatis tum externo corporis habitui præstitæ, quem ultimis sordibus, cuiuscunque sint generis, facilius expedit, si satis diluantur, tum cerebro, ubi spiritus ad animi munera tenues desiderantur è sanguine bilioso simillimo, quem serum suâ lymphâ temperat, ne desultorij nimis evagentur. An inde humor qui per nervos ad lymphatica vasa pertinere, & ex eis ad venas redire vulgatur? Sed ne quid turbarum latentem adhuc in herbâ anguem excitet, satis sit mucum ex hoc fonte, faucium linguæ ac palati uliginem derivare, ad lubricam istarum partium mobilitatem. Quidquid deinde biliosi excrementi fuerit de sanguine animali delibatum, id nisi in pilos abeat, ad externam auris concham rejicitur: non sine usu humoris prius attenuati, quisquis lentior, aut vaporis discussi, quisquis turbidior, mentis splendorem obscuraret. Quid igitur magis dubitas suam in corpore utilitatem cuius excremento, alimenti utilitate minorem tribuere: quam in rerum universitate suam cuius animalculo dignitatis speciem, quamvis humanâ inferiorem?

## V.

**S**I quid frustra de rerum usu dicitur à Medico, nihil tamen conjice frustra factum à Naturæ autore, qui suâ sapientiâ ni-

hil non dirigit ad finem sibi propositum. Felix est qui hunc animo assequitur; neque adeo infelix qui eum studiose inquirens, rei alijus usum etiam ex necessitate materiæ profectum, cum ignorato sine confundit. Nam quorsum pili, non melius quam unguis inter excrementa numerati? An ut caput deffendant, ac vestiant? Sed quorsum sub hirco, & ad pubem? Expecta naturæ vocem: Neque forsan erunt aliquando his locis, quam palpebris, aut superciliis inutiliores. Nempe in salubri hominis fabricâ, ne excrementum quidem debuit ab aliquâ corporis commoditate aberrare, ut inde sanitas & vita conservaretur, unde morbus consequitur & mors. Alvus enim statâ suâ naturæ periodo libera, quid non alacritatis animo & corpori importat? Eiusdem pigrities, quid deinde non confusionis & molestiæ? Vaga bilis nonne regio morbo retinet & tardigradum & decolor stercus? Quot denique homines è vivis erepti ob exhaustum suo excremento folliculum? Quot præterea ob plurimum humorem simul & semel vacuatum, seu purulentus seu aquosus effluxerit? Tantine esse potest ad vitam momenti lethale tabum; neque majoris intererunt partes humorum, ad alendum quidem ineptæ, sed quæ suum munus aliâ utilitate implent?

*Nullum est igitur sani hominis excrementum corpori inutile.*

### Domini Doctores disputaturi.

M. Ioannes Baptista Ferrand.

M. Guido Crescentius Fagon, Regina familia Medicus ordin.

M. Germanus Preaux.

M. Carolus Marteau.

M. Iacobus de Bourges.

M. Franciscus Blondel.

M. Antonius le Moine, Decanus.

M. Petrus Legier.

M. Iacobus Renaut.

Proponebat Parisiis CLAUDIUS HUGOT  
Cabilonenfis. A. R. S. H. MDCLXXVII.

P A R I S I I S,

Apud Franciscum Muguet, Regis & Illustrissimi Archiepiscopi  
Parisiensis Typographum.